



BOSNA I HERCEGOVINA
PARLAMENTARNA SKUPŠTINA
ZAJEDNIČKA KOMISIJA
ZA EVROPSKE INTEGRACIJE

Broj: 04/2-50-1-16-3-5/04
Sarajevo, 14. januar 2004.

ZAPISNIK

sa 3. sjednice Zajedničke komisije za evropske integracije

Sjednica je održana 13. januara 2004. godine, sa početkom u 11.15.

Sjednici su prisustvovali sljedeći članovi Komisije:

Vinko Radovanović, Filip Andrić, Boško Šiljegović, Mehmed Suljkanović, Branko Zrno, Nenad Mišić, Selim Bešliagić, Milorad Živković, Halid Genjac.

Sjednici su prisustvovali i Osman Topčagić, direktor Direkcije za evropske integracije, i njegove saradnice Daria Ramljak i Dženana Hodžić.

Odsutni su bili zbog bolesti: Fatima Leho, Ilija Filipović, Hilmo Neimarlija.

U odsustvu predsjedavajuće Komisije sjednicom je predsjedavao Vinko Radovanović, prvi zamjenik predsjedavajuće Komisije.

G. Radovanović je predložio sljedeći

DNEVNI RED

1. Program aktivnosti Vijeća ministara BiH za realizaciju prioriteta u 2004. godini iz Izvještaja Evropske komisije Vijeću ministara Evropske unije o izvodljivosti pregovaranja Bosne i Hercegovine i Evropske unije o Sporazumu o stabilizaciji i pridruženju, sa pratećim odlukama i inicijativama
2. Sastanak Mreže parlamentaraca za Jugoistočnu Evropu u Beču 22. i 23. januara 2004. godine
3. Razno:
 - Saradnja Komisije sa Direkcijom za evropske integracije i Vijećem ministara BiH
 - Zahtjev za imenovanje sekretara Komisije za evropske integracije

G. Radovanović je također predložio da se tema iz tačke 3. Dnevnog reda Saradnja Komisije sa Direkcijom za evropske integracije i Vijećem ministara BiH razmatra u okviru 1. tačke dnevnog reda.

Komisija je razmatrala predloženi dnevni red i prijedlog g. Radovanovića i jednoglasno ih usvojila.

Ad. 1. Program aktivnosti Vijeća ministara BiH za realizaciju prioriteta u 2004. godini iz Izvještaja Evropske komisije Vijeću ministara Evropske unije o izvodljivosti pregovaranja Bosne i Hercegovine i Evropske unije o Sporazumu o stabilizaciji i pridruženju, sa pratećim odlukama i inicijativama, Saradnja Komisije sa Direkcijom za evropske integracije i Vijećem ministara BiH

U uvodnoj riječi g. Radovanović je istakao da je Vijeće ministara BiH usvojilo Program aktivnosti za realizaciju prioriteta u 2004. godini iz Izvještaja Evropske komisije i prosljedilo ga Predsjedništvu BiH. Zajednička komisija za evropske integracije treba da da mišljenje o Programu

aktivnosti i prosljedi ga Domu naroda i Predstavničkom domu Parlamentarne skupštine BiH. Zatim je dao riječ g. Topčagiću, koji je istakao da je Direkcija dobila Izvještaj Evropske komisije 18. novembra 2003. i odmah počela planiranje aktivnosti. Direkcija je također od Evropske komisije dobila precizirane indikatore napretka, koji su u Programu aktivnosti navedeni u boldiranom tekstu. Izvještaj Evropske komisije očekuje značajan napredak u svih 16 prioriternih oblasti prije pristupanja pregovorima. Analiza Direkcije je dovela do zaključka da je potrebno obaviti 45 aktivnosti i formirati 25 institucija. Rok za obavljanje ovih aktivnosti je 31. maj. Analiza Direkcije pokazuje da se planirane aktivnosti mogu obaviti u tom roku. Da bi se rokovi ispoštovali predviđeno je usvajanje zakona po skraćenoj proceduri (60 dana) i u tom smislu g. Topčagić je zamolio za podršku ove Komisije.

U martu 2004. će slijediti izvještaj Evropske komisije o Procesu stabilizacije i pridruženja (SAP) uz koji će biti pripremljen i dokument o Evropskom partnerstvu, kao novi oblik saradnje s Evropskom unijom, dogovoren na sastanku u Solunu, koji će sadržavati prioriteta područja određene zemlje i aktivniji odnos Evropske unije.

Evropska komisija je rekla da neće predložiti pristupanje pregovorima ako ne bude napretka u ispunjavanju 16 navedenih prioriteta.

Direkcija je inicirala početak priprema za definisanje naše pregovaračke pozicije, te pripremu strategije i donošenje odluke o načinu ocjenjivanja usklađenosti naših propisa sa propisima Evropske unije.

G. Radovanović je zatim otvorio raspravu.

G. Živković se zahvalio Direkciji na obimnom i ambicioznom programu. Istakao je da moraju postojati osnovni uslovi za provođenje Programa aktivnosti, a to je minimum političkog konsenzusa između stranaka pozicije i opozicije i naroda. Kratki rokovi donose mogućnost da se greške naprave brzo i lako, a one se ne mogu brzo i lako ispraviti. G. Živković je istakao da Program treba da ima finansijski okvir, informaciju o tome da li je obezbijeđen novac, ko će finansirati aktivnosti i od koga treba tražiti finansiranje. Zamolio je da se to u najkraćem mogućem roku zatraži od Vijeća ministara.

G. Radovanović se složio s mišljenjem g. Živkovića u vezi sa neophodnošću političkog konsenzusa da bismo mogli raditi na realizaciji Programa. Komisija za evropske integracije bi mogla da bude inicijator sporazuma partija. Predložio je da se to razmotri na sljedećoj sjednici Komisije. Složio se i sa mišljenjem o prikazivanju finansijskog okvira Programa.

G. Zrno je rekao da se Programu nema što dodati. U vezi sa konsenzusom istakao je da je naša obveza postići konsenzus najprije u Parlamentarnoj skupštini. Složio se s prijedlogom g. Radovanovića. G. Zrno je ukazao na značaj tzv. evropskog lobiranja i mijenjanja medijske slike o Bosni i Hercegovini.

G. Mišić se zahvalio na Programu. Istakao je da globalno postoji politička saglasnost oba doma Parlamentarne skupštine za provođenje Programa i procesa evropskih integracija. Složio se da se konsenzus može još jednom zatražiti. Ukazao je, međutim, da je prioritarno obezbjeđenje novca i lobiranje. Izrazio je kritiku zbog nedovoljnog pisanja medija o ovom procesu.

G. Bešlić je ukazao na činjenicu da je ulazak u Evropsku uniju veća obaveza nego pravo. Pitao je da li se pored "političko-pravno-sistemskih" zakona mogu pripremiti i zakoni kojima ćemo obezbijediti pokretanje i zaštitu proizvodnje. Istakao je da mi imamo politički konsenzus, ali se i složio da se još jednom taj konsenzus potvrdi jednom deklaracijom. Istakao je da je potrebno znati koliko provođenje Programa aktivnosti košta, kako bi Parlament dao nalog Vijeću ministara da obezbijedi sredstva.

G. Šiljegović je pohvalio inicijativu Direkcije za evropske integracije. Prihvatio je inicijativu da se pojača konsenzus domova Parlamentarne skupštine u vidu deklaracije koja bi bila pripremljena na narednoj sjednici Komisije.

G. Suljkanović se složio s najvećim dijelom prethodnih izlaganja. Po njegovom mišljenju Program aktivnosti je preambiciozan. Pored konsenzusa, on je istakao mišljenje da sada svaki član parlamenta zna svoju ulogu u ovom procesu, kako se proces ne bi odugovlačio i kako ne bi bilo 30 amandmana na svaki zakon. Istakao je potrebu da Komisija za evropske integracije ima strategiju i da djeluje kao jedan tim.

Gđica Dženana Hodžić je izvjestila Komisiju da je Predsjedništvo na sjednici održanoj prethodnog dana dalo generalnu podršku Programu aktivnosti i predložilo da se Program hitno razmatra na sjednici Parlamentarne skupštine. Predsjedništvo također planira uskoro održavanje sjednice radno-konsultativnih tijela svih nivoa vlasti o ovoj temi.

G. Topčagić je istakao da je vrijeme bitan faktor. Od 18. novembra 2003, kada je dostavljen Izvještaj Evropske komisije, proteklo je dva mjeseca. Sva ministarstva već rade na realizaciji prioriteta iz Programa aktivnosti. Istakao je da moramo pokazati dinamiku u provođenju ovih prioriteta. G. Topčagić se složio da je potrebno prikazati troškove provođenja Programa aktivnosti.

G. Topčagić je podsjetio na inicijativu EU da preuzme vojnu misiju u BiH u konsultaciji sa vlastima BiH. Ako se to desi, uz prisustvo policije EU, posmatrača i Delegacije Evropske komisije, to će biti jedinstven slučaj tolikog prisustva Evropske unije u nekoj zemlji, tako da Evropska unija radi na strategiji svog djelovanja u BiH. Potrebno je da i mi radimo na strategiji Bosne i Hercegovine.

G. Andrić je istakao bojazan da ne budemo u poziciji da po članku 105. usvajamo zakone koji se odnose na oblasti iz Programa aktivnosti.

G. Radovanović je predložio da Komisija generalno pozitivno ocijeni Program aktivnosti Vijeća ministara BiH za realizaciju prioriteta u 2004. godini iz Izvještaja Evropske komisije i da ga uputi Parlamentarnoj skupštini na razmatranje, što je jednoglasno prihvaćeno.

Komisija je usvojila sljedeće zaključke:

1. Zajednička komisija za evropske integracije pokreće inicijativu za postizanje političkog konsenzusa o putu BiH u Evropsku uniju.
2. Komisija traži od Vijeća ministara BiH da prezentira orijentacioni finansijski plan sredstava potrebnih za realizaciju Programa aktivnosti Vijeća ministara BiH za realizaciju prioriteta u 2004. godini iz Izvještaja Evropske komisije.
3. Komisija ističe značaj uloge medija u procesu evropskih integracija, te kao Komisija stoji na raspolaganju medijima, i ističe potrebu propagiranja puta BiH u Evropsku uniju.
4. Radi realizacije Programa aktivnosti u zadatim rokovima Komisija preporučuje Domu naroda i Predstavničkom domu Parlamentarne skupštine BiH usvajanje zakona po skraćenoj proceduri kad god je to moguće.
5. Komisija preporučuje da svi zakoni koji se odnose na oblasti iz Programa aktivnosti Vijeća ministara BiH i Procesu stabilizacije i pridruženja odnosno evropskih integracija nose oznaku "E", što označava njihovu usklađenost s propisima Evropske unije.

- **Saradnja Komisije za evropske integracije sa Direkcijom za evropske integracije i Vijećem ministara BiH**

U vezi sa saradnjom između Komisije i Direkcije g. Topčagić je rekao da se očekuje aktivan odnos između Vijeća ministara u cjelini i Parlamentarne skupštine u cjelini. Bilo bi dobro da Komisija za evropske integracije bude informirana o nekom dokumentu i prije nego što ga usvoji Vijeće ministara, uz međusobno razumijevanje da je u tom slučaju još neusvojeni dokument dostavljen samo u svrhu informiranja Komisije.

G. Topčagić je rekao da će Direkcija jednom mjesečno izvještavati Evropsku komisiju o dinamici provođenja Programa aktivnosti, i predložio da Direkcija na isti način izvještava Komisiju za evropske integracije.

Prijedlozi g. Topčagića su jednoglasno prihvaćeni.

Gđica Daria Ramljak je u vezi sa temom Saradnja Komisije i Direkcije za evropske integracije istakla da je Direkcija dobila mišljenje eksperata u Direkciji da bi bilo potrebno formalizirati tu saradnju, što je i zahtjev Evropske komisije.

Zaključeno je da Komisija za evropske integracije uputi pismo predsjedavajućim komisija za izmjenu Poslovnika sa informacijom da je potrebno predvidjeti nadležnost i pravo Zajedničke komisije za evropske integracije da koristi svu stručnu pomoć Direkcije i nadležnih institucija i raspoložive resurse.

Ad. 2. Sastanak Mreže parlamentaraca za Jugoistočnu Evropu u Beču 22. i 23. januara 2004. godine

Komisija je razmatrala učešće članova Komisije na Sastanku Mreže parlamentaraca za Jugoistočnu Evropu 22. i 23. januara 2004. u Beču. Zaključeno je da na ovom sastanku učestvuju dva člana kolegija Komisije i jedan član Komisije, a da na budućim ovakvim sastancima u delegacijama učestvuju jedan član kolegija Komisije i dva člana Komisije, te da se vodi računa o zastupljenosti oba doma Parlamentarne skupštine i predstavnika stranaka pozicije i opozicije. Zaključeno je da na sastanku Mreže parlamentaraca u Beču učestvuju: Vinko Radovanović, Filip Andrić i Selim Bešliagić, i da delegaciju prati Sena Bajraktarević.

Ad. 3. Razno: Zahtjev za imenovanje sekretara Komisije za evropske integracije

Na prijedlog g. Radovanovića zaključeno je da Komisija uputi zahtjev Kolegijima oba doma da se imenuje sekretar Zajedničke komisije za evropske integracije.

G. Topčagić je rekao da bi ambasador Irske u Sloveniji i ambasador Holandije u BiH, koji predstavlja Irsku u Bosni i Hercegovini, željeli da se obrate Komisiji, i da održe konferenciju za novinare u okviru promoviranja prioriteta Irske kao predsjedavajuće EU. Predložili su datum 28. januar 2004. G. Topčagić je zamolio da ga Komisija obavijesti da li joj taj termin odgovara.

G. Topčagić je predložio prethodno održavanje susreta sa predstavnicima Delegacije Evropske komisije u BiH, kako bismo čuli njihovo viđenje prioriteta Evropske unije, orijentaciono početkom sljedeće sedmice.

Sjednica je zaključena u 13.30.

Zapisnik sačinila
Sena Bajraktarević

Fatima Leho,
predsjedavajuća Zajedničke komisije
za evropske integracije